

Uunga siunnersuut: Namminersornerullutik Oqartussat kommunillu inissiaataannik attartortittakkanik inissiatut imaluunniit illutut nammineq pigisatut tiguisarneq pillugu Inatsisartut peqqussutaata allanngortinneqarnera pillugu Inatsisartut inatsisaat nr. xx, xx. xxx 2018-meersoq (Taarsigassarsianik sioqqutsilluni akiliisarneq)
(Ineqarnermut Attaveqaqatigiinnermullu Naalakkersuisoq)

Saqqummiussineq

(Ineqarnermut Attaveqaqatigiinnermullu Naalakkersuisoq)

Siullermeerneqarnera

Inissianik aningaasalersuisarneq pillugu Inatsisartut inatsisaata nr. 39-p, 23. november 2017-meersup aamma pigineqatigiilluni inissiat pillugit Inatsisartut inatsisaata nr. 33-p, 23. november 2017-meersup akuersissutigineqarnerisigut taarsigassarsiat maanna naliusut malillugit siusinaartumik akilerneqarsinnaanerannik ammaassinissaq siunnersuummi tunngavigineqarpoq.

Siunnersuutip matuma saqqummiunneqarneratigut taarsigassarsiallit, Namminersornerullutik Oqartussat kommunillu inissiaataannik attartortittakkanik inissiatut imaluunniit illutut nammineq pigisatut tiguisarneq pillugu Inatsisartut peqqussutaat nr. 12, 19. november 2007-meersoq, kingusinnerusukkut allannguuteqartinneqartoq naapertorlugu taarsigassarsisimasut siunissami taarsigassarsiaminnik, attartortumiit piginnittunngorsinnaanermut aaqqissuussa naapertorlugu taarsigassarsisimasut assigalugit siusinaartumik akiliisinnaanissamut periarfissinneqarnissaat kissaatigineqarpoq.

Attartortup inissiamik attartukkaminik inissiatut imaluunniit illutut nammineq pigisatut tiguisinissaminut atatillugu akigitinneqartup 40 %-a tikillugu Namminersorlutik Oqartussanit imaluunniit kommunimit taarsigassarsinissamik piumasaqarsinnaavoq. Namminersorlutik Oqartussat imaluunniit kommuni tunisineranut akiusup sinneranut aningaasalersueqataasinnaangilaq. Taarsigassarsiat ukiuni 20-ni erniaqassanngillat akilersugassaassanatillu, tamatumalu kingorna ukiuni 15-ini angeqqatigiikkaaraluni akilersugassanngussapput, ukiumut Nationalbankip erniarititaasa 3 %-inik ilallugit amerlaqataannik erniaqartinneqarlutik. Taamaalilluni piffissaq taarsigassarsiat akilersorneqarfissaat ukiunik 35-nik sivissuseqassaaq.

Piffissap akilersuiffissap sivisuup iluani siusinaarluni taarsigassarsianik akiliisoqartarnera tunngavigalugu Namminersorlutik Oqartussat kommunillu aningaasassaqaalertarnissaat, taamaalillunilu aningaasat siunertanut allanut atugassiissutigineqartarnissaat naatsorsuutigineqarpoq.

Tassalu taarsigassarsisimasoq taarsigassarsiami sinnerinik siusinaartumik akiliinissamik kissaateqarpat, siunnersuummi matumani taarsigassarsisimasup taarsigassarsiaminik maanna naliusut atorlugit akiliisinnaanissaa periarfissinneqarpoq.

Siunnersuummi uani kissaatigineqarpoq januaarip aallaqqaataa 2019 sioqqullugu taarsigassarsisimasut aamma siusinaarluni taarsigassarsianik taarsiisinnaanermut periarfissinneqassasut.

Taamatut oqaaseqarlunga Naalackersuisut sinnerlugit immikkoortoq Inatsisartuni
suliassanngorlugu tunniuppara.